

مازن  
م. رياض



Echoes of March

رحلة في أعماقنا، بين طيات الوقت، وعتمة الفقد

الفصل الأول  
أرخبيل الحنين

١

إِذَا تَبَالَتْ صُحُفُ اللَّقَاءِ، فَمَا هِيَ إِلَّا صَفْحَةٌ  
بَيْضَاءُ

نَطْوِي بِهَا شُرُوقَنَا، وَلَمَعَاتُ الْعُيُونِ دَرَكَ  
الدُّجَاءِ

## نوفمبر ٢٠١٧

في بداية سنين الجامعة، كان بيتمشى في أروقة الكلية، يحاول يحدد هدفه في المرحلة الجديدة دي.

لما كانت الشمس لسة مهبطتش للغروب، شاف بنت واقفة قدام خريطة السكاشن، باين عليها التوتر والحيرة. كانت جديدة في الكلية وبتحاول تدور على قاعة السكاشن بتاعتها، لكن كان واضح عليها إنها مش عارفة فين تروح.

كان لسه متبقي عنده طبيعة طيبة ومحبة للمساعدة نوعًا ما، قرر يقرب منها وقالها بهدوء، "احم، محتاجة مساعدة؟"

بصّته وكأنها مش مصدقة إن حد ممكن يقدم لها المساعدة كده بدون ما تطلب.

الرد بتاعها كان بارد شوية، مكانتش متحمسة للحوار مع حد، كأنها كانت مشغولة بقلقها أو مش عايزة تبدأ علاقة جديدة.

لكن كان مصمم يساعدها، وأخذها بنفسه للقاعة اللي كانت بتدور عليها. لما وصلوا، شكرته ببرود، لكن في عينيها كان فيه نوع من الامتنان، ومن اللحظة دي، بدأوا يتعودوا على بعض بشكل غير متوقع. بما إنهم كانوا الاثنين غرباء في الكلية وميعرفوش حد، قرروا يروحوا مع بعض ويمشوا مع بعض.

كان لسه بيتعرف على الحياة الجامعية، وهي كانت بتحاول تتأقلم مع البيئة الجديدة.

مع مرور الأسابيع، بدأت العلاقة بينهم تتطور. كان بيكتشف جوانب جديدة في شخصيتها، ويشوف فيها مزيج من الشغف وفقدانه.

بدأت تبص له كشخص موثوق فيه، وهو لقي فيها صديقة صادقة وداعمه في فترة الانتقال الحياتية الصعبة.

بدأت جلساتهم الدراسية ومشاورير الكلية تتحول لفرص للتحدث ومشاركة الأفكار والأحلام.

في النهاية، العلاقة التي بدأت من مجرد مساعدة صغيرة، نمت وتعمقت، وصاروا سليم ورهف أكثر من مجرد صحاب. كل واحد فيهم لقي في الثاني ساند له في رحلة الجامعة التي كانت مليانة تحديات واكتشافات جديدة.

## ١٣ أغسطس ٢٠١٨

وسط صمت الليل الهاديء، على كنبه قديمة.. بينه وبين النوم أكثر من مجرد غمضة عين.. وبينه وبين راحته أكثر من مجرد يوم جديد في شقته الصغيرة، باردة الملمس.

الساعة ١١ بالليل في ليلة من ليالي الصيف في احد أحياء القاهرة الشعبية.

شاب مُهتز، عليه هالات سودا تحت عيونه من كتر السهر، بشعر بني غامق .. مجعد يبان عليه السواد.

جُسمان أحسن حالاته، بحالته النفسية السيئة اللي كانت السبب الرئيسي في نزول وزنه.

ممدد، بضوافره الطويلة ودقنه المنبته.

لا بيكلم حد ولا بيرد على حد بقاله أيام، منذ سمع بخبر نزل عليه كالصاعقة، خبر هز بدنه وأفكاره، خلاه يعيش في صراع داخلي مش عارف يهرب منه.

الباب بيدق.

”مين؟“

”الدليفري يا فندم.“

”سيبه عالباب وامشي.“

كنا نقدر نقول عليه طموح نوعًا ما، كان نفسه يبقى حاجة مهمة بين الناس  
اللي عايش معاهم، يبقى لوجوده معنى يُشهد عليه البشرية..

بس للأسف، مكانش بيعمل كتير عشان يوصل لطموحاته.

كانت دايمًا احلامه كبيرة، لكن خطواته صغيرة شوية...

## ١٥ أغسطس ٢٠١٨

سليم على سيره بعد كذا يوم من السهر المتواصل، وكان الإعياء واضح عليه، بس مقدرش يستمر على الحال ده، اتغلب عليه النعاس والتعب.. ساعتين بعد ساعات وأيام طويلة من التجوال في أفكاره والبحث عن الخلاص، وساب نفسه تستسلم.

صحي فجأة من النوم.. مخضوض.. لقي نفسه داخل ممر طويل بجدران بيضاء ضبابية.. الجدران كانت شبه شفافة، ويين وراها مشاهد مش واضحة. كل جدار كان فيه مقابض أبواب كثير، مش مرتبة بشكل منطقي، وكل مقبض كان موصول بمشهد من...  
ذكرياتي؟!!

بدأ يبص على المقابض اللي كلها شبه بعض، ويبص على كل ذكرى متوصلة بيهم.. بس مكانش قادر يشوف إلا ذكرياته مع رهف، اللي كانت ضبابية برضو ومش واضحة تمامًا. اتحرك بتردد نحو واحد من المقابض الموصولة بذكرى مش مألوفة، مسكه بجذر..

فجأة، لقي نفسه في مكان تاني تمامًا، كان عبارة عن قاعة قديمة مألوفة بالنسبale، مغطاة بالغبار.. كل حاجة كانت زي الذكريات، لكن بأسلوب أكثر واقعية.. مختلطة بعدم وضوح، كأنه دخل جوا لوحة فنية.

في القاعة،

كان قادر يشوف نفسه وهو واقف باصص من شبك القاعة، قادر يشوف المكان برا القاعة ويتحسس ببعض تفصيلاته. ووعيه الحالم كان موجود لكنه مش قادر يتفاعل مع الذكريات اللي حواليه، كأنها أشباح مش حقيقية.. مش ملموسة.

على الأرض، لقي ورقة مرمية وسط ورق كثير، مكتوب عليها كلمة "اخرج"

بخط عشوائي ومش واضح.. كانت مرسومة بطريقة بدائية على صفحة في وسط الذكرى.

بمجرد ما لمح الكلمة، سليم حس بدفعة قوية، وساب المكان فجأة.. استفاق سليم من نومه وهو مش فاهم إيه اللي حصل. الكلمة "اخرج" كانت مطبوعة في ذهنه، لكنه حاول يتجاهلها، وكمل يومه كأن مفيش حاجة حصلت.

الليل جه من جديد، وسليم حاول ينام مرة ثانية، لكن الأرق كان مسيطر عليه. في لحظات قبل الفجر، سليم كان حاسس بقلق غير مبرر، وكأن فيه شيء غامض وراه. عينيه بدأت تقفل، وقبل ما يغرق في النوم، كان فيه إحساس قوي بأنه هيدخل تاني للعالم اللي سماه وقتها بـ "أرخبيل الذكريات".

## ٢٠ أغسطس ٢٠١٨

تعدي أيام، وسليم يدرك ان أرخبيل الذكريات كان مجرد حلم تائه بيه أحلامه،  
وانه متكرش تاني زي ما كان متخيل..  
وفي ظل الليالي الباردة اللي بيعيشها، وقاعد في الصمت الدائم، وباصص  
للحيطة الفارغة من المشاعر والعواطف زيه.

مكانش سامع صوت، بس أفكاره الداخلية الملخبطة، اللي كلها ورا بعض  
وفنفس الوقت، كانت كفيلة تقتل أي حد يسمعها نفسياً.

من بين ذكريات الشاب ذوال ٢٠ سنة،  
الانسان البسيط اللي مش بيقدم كتير في العلاقات، بس ده مكانش معناه إنه  
شخص سيء فحكاية الشخصيات الي حبته.. يمكن هو كان سيء فعلاً من  
البداية بس في رواية نفسه.

بيفتكر لما كانت ”رهف“ بتمشي معاه كل يوم جامعي خفيف على قلبه  
بوجودها.  
البصة اللطيفة البشوشة على وشها في عز الحر والشمس وهي بتقوله،  
”أجبلك شوكلاتة؟“ وهي ناسية انه مش دايمًا كان بيحبها، لولا ان هي الي  
بتجيبها له.

يفتكر ضحكتها الي كان بيضحكها لها بألشاته ونكته الهايفة.  
مكنش قادر يستوعب فعلا هي بتضحك عليها ولا بتضحك على محاولاته  
المبتذلة إنه يضحكها، بس مجرد محاولته كانت كفاية إنه يشوف الضحكة  
الشبه واقعية دي، فمفكرش في الموضوع كتير.

رهف، بعيونها البنية الفاتحة الي تبان برتقالي في ضوء غروب الشمس،  
وجمالها الخلاب في اللون الأزرق والأسود، وشعرها القصير ونضارتها ذات  
الاطار الأسود اللامع.

## الموبايل بيرن.

أخته الصغيرة "يُسرى" الي عندها ١٥ سنة، داعمته بعيدة المدى بعد والدته بتحاول تظمن عليه بعد ما والدة سليم فقدت الأمل إنه هيرد عليها. وكالعادة، سليم يشوف تلفونه من بعيد ومش بيرد.

## ٢١ أغسطس ٢٠١٨

بعد أيام من الأرق، ومحاولات من النوم اللي دامت لساعات طويلة، أخيرًا قدر  
ينام تاني..  
التعب النفسي كان متراكم، عليه والنوم كان متوقَّع يكون هادئ، لكنه حس  
بشيء غريب تاني وهو مستسلم للنعاس.

نام.. ويلاقى نفسه في نفس الممر الطويل اللي شافه قبل كده، لكن المرة دي  
كان فيه تغييرات.. الجدران الضبابية اللي كان شايفها قبل كده بقت خلفيتها  
واضحة أكثر، وذكريات كتير بدأت تظهر بشكل أقوى.

بينما كان بيمشي في الممر، لقي نفسه قدام دبدوب طفولته "شيرو" مرمي على  
الأرض... كان الإحساس مألوف، ولحظات الطفولة رجعت له في لحظة.

يعدي مشهد سريع ادامة، وهو مشهور في مدرسته وفعالمه بابتسامته اللي  
مبتفارقش وشه، حتى لما الأمور بتكون مش في صالحه.  
الولاد في المدرسة مكانوش بيحبوا ده، وكانوا بيتريقوا عليه... كانوا يقولوله  
"انت مبتسم ليه طول الوقت؟ في إيه مضحك؟"  
بس سليم عمره ما كان بيقدر يشرح لهم.  
الابتسامه دي كانت جزء من شخصيته، حاجة بتطلع منه تلقائيًا من غير  
سبب.

بس التنمر اللي كان بيتعرض له أثر عليه بطريقة هو مش فاهمها وهو صغير.  
كان يرجع البيت بعد يوم طويل في المدرسة، ويقعد مع نفسه في غرفته،  
يحس بمشاعر مش مفهومة، خليط بين الحزن والضيق، لكنه عمره ما اشتكى،  
ويرجع يبتسم تاني زي الأول.

المشهد التاني كانت من لحظة صعبة مع والده.

كان سليم قاعد في غرفته، ماسك دفتر صغير بيكتب فيه رسالة الى "سارة"  
صديقة طفولته.

فجأة، والده دخل الغرفة بوجهه القاسي وكلماته الحادة لما شاف الدفتر.. كان

سليم وقتها مجرد طفل صغير، نظراته مليانة بالأمل.

كل الي قاله والده ساعتها كان، "الحب مش للصغيرين، مش وقت رفاهيات، ركز في دراستك ومستقبلك." قالها والده بصوته الحاد، ونبرة القسوة المعتادة..

سليم حاول يشرح لوالده كيف إنه بيشعر بشيء خاص تجاه سارة، البنت الي كانت بتضحك له في المدرسة وتشاركه شغفه بالفن. لكن والده كان مصر على رأيه، واعتبر كل مشاعر سليم مجرد ترف. الذكرى دي كانت مليانة بالإحباط، سليم كان بيحاول يبين لوالده إنه حاسس بشيء حقيقي، لكن والده كان شايف إن مشاعره دي مجرد إلهاء.

ينتهي المشهد من ادامة، يغض أفكاره كأنه مشافش حاجة لأنه مش حابب يفكر والده.. ويروح ياخده الفضول ويمسك "شيرو"، وحس بشيء من الدفء، وكأنه بيعيد لحظات طفولته، ولعبته المفضلة الي كان بيحتضنها لما كان صغير.

يبص ادامة فجأة ويلاقى نفسه دخل جوا ذكرى قديمة.. كان شايف نفسه في الفصل مع سارة، مزيج بين طفولته واعجابه القديم لزميلته في المدرسة الابتدائية، مش قادر يتفاعل معاها، بس شاف دبدوبه الصغير "شيرو" واقف جنبه بيتحرك ويهمس فودانه "مش هنا."

وبينما كان مستمتع باللحظة ويحاول يفهم الي قاله شيرو، لقي نفسه تاني بيشوف كلمة "اخرج" مكتوبة على حيطه الفصل. مكانش قادر يفهم الكلمة بتوجد بشكل عشوائي فالأرخبيل، وبدون ما يلحق يلمسها، حس بحاجة جواه بتسحبه فجأة، الكلمة "اخرج" كانت واضحة المرة دي بشكل غريب، وكأنها دعوة للخروج من العالم ده، أو كتحذير من البقاء في الذكريات دي بالذات، او تنبيه أنه المفروض يكون فذكرى تانية.

شعور التوتر كان قوي، وحس إن العالم من حوله بدأ يتغير... ببطء، بدأ الممر يختفي، وسليم شعر بضغط مفاجئ، لحد ما استفاق فجأة من نومه.

صحي سليم في الثامنة صباحًا، قاعد على سريريه، مش قادر ينسى الأحلام اللي شافها.

تجربة اللعب مع "شيرو" وذكرياته مع سارة كانت مثيرة للاهتمام والقلق  
فنفس الوقت.

لكن الكلمة "اخرج" فضل حاسسها بمثابة رسالة غير مفهومة من أرخبيل  
الذكريات.

قرر إنه يحاول يستمر في يومه بشكل عادي، لكن التجربة دي خلفت في ذهنه  
الكثير من الأسئلة، وكان عنده شعور غريب إنه في حاجة أكبر ورا الأحلام دي..  
حاجة محتاج يكتشفها بشكل أعمق.

## ١٧ سبتمبر ٢٠١٨

تعدي أسابيع وسليم على نفس الحال، كنبه سليم المهترئة، وأخته اللي بتحاول تتواصل معاه او تعدي عليه كل بعض أيام. ولا يزال سليم مش جاهز إنه يفتح قلبه لحد، ومش جاهز إنه يستهلك ذرة زيادة من عواطفه في مكان مش مناسب، أو حتى مناسب.

## الباب يخبط.

سليم، "مين؟"

يسمع صوت رقيق خفيف على السمع والقلب بيقول، "سليم؟" يرد بنظرة استغراب وألفة، "ليلى؟!"

ويعم السكوت شوية، سليم يقوم يفتح الباب عشان يشوف مين اللي بيخبط عليه. وفي ظروف غير معتادة، يلاقي حبيبته من فترة الزمن الجميل، "ليلى".

واقفة عالبا، بصاله نظرة توحى بالشفقة والشغف وبتقوله بأبتسامتها الرقيقة، "ازيك، عامل إيه؟"

سليم، "أنا كويس الحمد لله.

ياه عالايام.. ياه بجد، أحلويتي كده امتي؟

وتتلاقى نظرات عيون سليم بعيون ليلى لوهلة من الزمن..

قبل ما تتعرف ليلى على سليم كانت بتقعد في غرفتها الصغيرة في السكن الجامعي بالقاهرة، الهدوء مكانش حاجة مريحة بالنسبالها.

كانت متعودة على الدوشة والأصوات المتداخلة، تحب الحركة اللي حواليتها والأماكن المزدحمة اللي بتحسسها إنها مش لوحدها، ولما قررت تنتقل للقاهرة للدراسة، كان قرارها نابع من رغبة قوية انها تثبت نفسها.

هي بنت من مدينة بعيدة، مدينة أهلها بيحبوها ويأمنوا ليها كل الي يقدرها.

عليه، لكن ليلي دايماً كانت عاوزة تفكر برا الصندوق.

عايزة تبقى مختلفة، قوية ومستقلة.

من بعد ما وصلت القاهرة لأول مرة، بدأت تشتغل جنب دراستها، مكانتش مضطرة، لكن كانت مصممة تعتمد على نفسها. كل قرش كانت تكسبه كان يعني ليها كثير، مش بس فلوس، لكن كدليل على قدرتها على الاعتماد على نفسها.

ورغم كل ده، الوحده كانت بتخبط على بابها بين الحين والتاني.

صحيح بتحب الزحمة والأماكن الصاخبة، لكن لما ترجع غرفتها، كانت بتحس بشوية فراغ.

لكنها كانت بتشغل الفراغ ده بقوتها الشخصية، تحب تقعد مع نفسها تقرا كتاب أو تتفرج على أفلام او تطور نفسها فمجال دراستها علم النفس، وكانت بتحس بالرضا والاكتفاء.

كانت عارفة إنها مش زي البنات اللي بتستنى حد ينقذها أو يملأ حياتها. هي البطلة في قصتها، القوية اللي بتاخذ قراراتها بنفسها، وكانت مؤمنة إن اللي يكمل حياتها لازم يكون حد يستحق مش مجرد يشغل فراغها. وكان ده احد اكثر الحاجات الي جذبت سليم ليها.

لكن في لحظة واحدة، كل ده حاجة فحياتها اتغيرت، كان مجرد شاب زي أي واحد، لكن كان فيه حاجة في عيونه وطريقة كلامه شدت انتباهها.

حست إنها عايزة تعرف عنه أكثر.

سليم، على عكس ظاهر ليلي، كان واضح إنه شايل هموم كثير، مكانش بيحاول يخفي ده بل كان باين انه بيحاول يتجاهله، وكانت بتحس إن الحاجة دي بتربطهم ببعض.

يمكن لأنها شافت في عيونه جزء من نفسها، الجزء اللي كانت دايماً بتحاول تخفيه.

سليم بقى جزء لا يغنى عنه فحياتها من غير ما تاخذ بالها.  
بقى الشخص اللي بتفكر فيه قبل ما تنام، واللي بتقلق عليه لما يغيب.  
ومع الوقت، بقت عارفة إنها مهما كانت قوية، مفيش مانع إن حد تاني  
يشاركها حياتها ويكون جزء من قوتها.

**يقولها سليم، معلى سرحت شوية، ايه الي فكرك بيا امال؟**

تبص ليلي من غير قصد على خلفية سليم، تشوف كنبته المهترئة وعلب الأكل  
اللي كان بيطلبه مرمية في كل حنة. يمكن الحاجة الإيجابية الوحيدة إن الشباك  
كان مفتوح، دا لو مكانش بيفكر ينتحر يعني.

**ليلى، "سمعت باللي انت فيه من يُسرى وجيت اتطمئن عليك.  
عادي فيها إيه."**

**سليم (بنبرة كلها صراحة)، "فيها إن مفيش بيني وبينك حاجة دلوقتي.  
هفرق معاكي في إيه عشان تيجي تطميني عليا؟"**

**ليلى، "تفرق، تفرق يا سليم.  
أنا عمري ما كنت عاوزة أمشي، بس نظرتك التشاؤمية للحياة وعدم إبدائك  
الإهتمام زي مانا كنت بعمل، عدم تقديمك في العلاقة كثير، كل دا حسسني  
إني غير مرغوبة هنا.**

انت اديتني طموح اني هفضل دايمًا مبسوفة بكونك لطيف وحنين ومش  
بتتطلب كتير فالعلاقة، بس كل دا فجأة اتغير.

**تسكت ليلي شوية وتبص في عيونه وتكمل**

بس أنا لسه شايفاك رغم محاولاتي الكثير إني أتخطى وانسى عشان  
متوجعش، بس أدركت ده فعلاً وأنا بحاول أتخطى.

انت بقا أدركت إيه؟ ولا حاجة، رح شوفت حد يملأ الفراغ اللي أنا سبته  
عادي جدا، وأديك اهو بعد ما كان عندك القرار تتغير للأحسن من بعدي،

اتغيرت للأسوء.“

سليم بنبرة عصبية، ”انتِ جاية تجلدي ذاتي طيب ولا إيه بالظبط؟ عشان أنا الي فيه كفيل انه يجلدني من غير تدخلك بصراحة والحوار مكانش طالبك خالص.

انتِ ليه مش قادرة تفهمي اني اتغيرت لا ارادياً بسببك؟! تصرفاتك الطفولية المهملة، عدم تحملك مسؤولية نفسك ومسؤولية الأشخاص الي بتتعاملني معاهم، انك مش قادرة تبقي ناضجة كفاية.. كل الحاجات دي قلتلك ألف وواحد مرة تغيريهم شوية عشان نفسك وعشان متحرقيش أعصابي معاكي فكل حاجة وانتِ ولا هنا!“

لَيْلى (بابتسامة حزينة)، ”مش جاية أعمل حاجة، هعدي عليك في يوم تكون أروق من كده فيه.“

سليم، ”معتقدش إني هكون رايق ولا كويس فأى وقت قريب للأسف.“

لَيْلى، ”يبقى هعدي عليك في يوم أكون أنا أروق من كده، آسفة إني ضغطت عليك.“

سليم، ”ولا يهملك يا لَيْلى، هحب انك ترجعي تاني.“

## ٢٥ أغسطس ٢٠١٨

تعدي أيام من غير ما تجيله أحلامه الغربية، ويظل السؤال في باله.. هل كل حاجة مرتبطة ببعضها بطريقة ما؟

تخبيط جامد عالالباب الساعة ٦ الصبح.  
”سليم! اصحى بسرعة يا سليم! ماما ماتت!“

سليم تختفي ادامة ملامح كل حاجة، ينسى كل حاجة كان يفكر فيها، وكل الي شايفه ادامة يتحول لسواد..  
للأسف متسناش لسليم انه يقدر يحب حد في طفولته غير والدته.

هي اللي كانت بتدلعه وبتدافع عنه عشان تحاول تخليه يتجنب صدمات العيلة العاطفية وتصادمهم المتكرر على مدار سنين كثير، وبتحاول تعوض قساوة والده، اللي كان بيشفه مش بيقدر أي حاجة بتعملها أمه، وده كان بيوجع سليم أكثر.

كان حبه لوالده مشروط بالمعاملة اللي بيستمدها منه، وكانت أغلب معاملته سيئة، صارمة وقاسية زي معظم الآباء فالجيل القديم.

بس لما كبر شوية، ممكن يكون أدرك جواه إن والده كان عايز بس يربيه صح، بس ده ممحاش سنين القسوة والعداوة الي اتبنت جواه.

والكلمتين دول وقعوا على سمع وقلب سليم زي الصاعقة في ليلة شديدة الأمطار والظلام.

”ماما ماتت.“

مجرد كلمتين، وصدمة جديدة اتضافت على صدماته.

## ٢٦ أغسطس ٢٠١٨

يفتح دولابه، وفي خلفية الدولاب البنية، بتتسحب عليه ذكريات طفولته مع والدته.

ذكريات مشاعر متضاربة، بين ضيق من طيش الطفولة وسعادة نقية من أبسط الحاجات.

أيام ما كانت السعادة حقيقية، والفرحة بتكفيها أقل الأشياء، أيام لما كان سليم لسه عنده حلم كبير يبقى مشهور بيه في العالم.

بيطلع قميصه وينطلونه الأسودين، لونهم قاتم زي قلبه فالحظات دي. في لحظة سرحان، دموع سليم تنزل بهدوء، من غير صوت

يقول سليم لنفسه، "كان نفسي أقضي وقت معاك أكثر من كده، وقت أكثر أحضنك فيه بدل ما كنت برفض. كان نفسي تستني لحد ما أقدر أفتح قلبي لحد، وكنت هفتحهولك إنت. مشيتي بدري أوي يا أمي."

يلبس سليم ويجهز نفسه للجنابة، محيط ومش قادر نفسياً يتكلم مع حد. يروح الجنابة ويبص في الوجوه المعروفة، ويشوف والده على غير المتوقع. سليم يبص لوالده بنظرة مليانة غضب مكبوت، ويقول، "كنت مبسوط وانت بعيد عنها، صح؟

سايبها لنفسها زي ما سبتني لنفسي، ولا فكرت حتى تظمن عليا." والده يرد بنبرة هادئة وصارمة يرد عليه، "أنا اعتمدت تربيتي ليك إنك تطلع شخص مسؤول وواعي لأفعالك وتصرفاتك لوحذك. انت مش عيل صغير."

يرد سليم بمرارة، "وأنت بتمثل دور إيه بقي؟ دور الاكس اللامبالي؟

ولا دور 'أنا عملت اللي عليا'؟  
 أمي كانت مسؤولة منك، وانت بعدت عنها وسبتها عشان مصالحك  
 الشخصية، عشان رغباتك الشخصية!  
 عشان لما لقيت انك غيرتها بنفسك لحاجة انت مش عاوزها مشيت بمنتهى  
 البساطة!  
 يسكت شوية ويبص لوالده نظرة خيبة أمل  
 انت ملكش حق تيجي هنا."

يقف بعد وهلة من الصمت، ويعزي الناس الموجودين من أقاربه، وبعدين  
 يقف على قبر والدته لحد ما كل الناس تمشي، ماعدا اخته يُسرى.  
 بص لُيسرى بنظرة فيها شوية قلق، "أكيد دلوقتي انت محتارة هتعيشي فين  
 ومين هيصرف عليكي.

### سكت شوية وكمل كلامه

بس متخافيش، انا متأكد ان بابا مش بيكرهك، وعمره ما عنفك ولا ضريك  
 وانت صغيرة."

يُسرى ردت عليه بنبرة كلها مشاعر مكبوتة، "عارفة، بس ده مش مبرر.  
 لو بيحبنا مكانش هيسيننا من الأول ويفضل نفسه علينا."

سليم حاول يوضح الوضع، "انت مفيش قدامك خيارات تانية دلوقتي يا  
 يُسرى.

انا مش هقدر اتكفل بمعيشتك، انا بتكفل بمعيشة نفسي بالعافية.  
 وامك الله يرحمها مهما كانت شايلة فلوس عشان لو حصل حاجة زي كده،  
 مش هتكون كفاية لسنين، بالكثير هتكفيكي شهور.  
 ومش هتقدري تتكفلي بنفسك لوحدك."

يُسرى هزت رأسها، "حاضر، بس لو حصل أي حاجة مش عاجباني من  
 ناحيته، هاجي أعيش معاك ونشوف حالنا سوا.

أنا مسؤولة منك برضو.

أخذ سليم نفس عميق، "ماشى، مفيش مشكلة."

يُسرى مشيت وسليم فضل واقف شوية قدام قبر والدته، باصص للسما  
وأيديه فجيبه.  
بعد ما خسر حاجات كثير، بيحاول ميفقدش السيطرة على عواطفه تاني.

هَكَ أْنَا قَاتِكُ شُعُورِي أَمَّ هِي لَا تَوَدُّ  
شِفَاهَا؟

أَيِّنَ نَحْنُ مِنْ هَوَاجِسِ الْفِكْرِ حِينِ  
نَحْتَاجُ السَّلَامَا.

## ٢٧ أغسطس ٢٠١٨

سهران كعادته، مش قادر يبطل تفكير.. تبدأ الشمس تطلع ويمر ادامه شريط ذكرياته مع والدته وهو طفل، ويمر ادامه شريط اخر كام سنة من حياته اللي كان فيهم بعيد عنها، يغرق فالبؤس والندم، والاكتئاب اللي بيتغلب عليه الى النعاس والغرق في النوم.. على كرسيه فالبلكونة

واقف عند باب الجامعة، بيشوف نفسه وهو مستني رهف، لكن المرة دي، سليم الحالم كان قادر يحس بالرياح اللي بتهب حواليه، بشوفة الشمس الصباحية اللي كانت بتغطي المكان بلون دافي، وبسماع الخطوات اللي كانت بتقرب منه.

بس كانت حركة بطيئة وتقلية كالعادة جوا الذكرى، وكأنها بتحارب ضد قوة خفية.

حس إنه ممكن يتفاعل مع الذكرى، بس كان فيه حد معين للفعل ده، وكان فيه قيود على حركته.

يلاقي فجأة رهف قربت منه في الذكرى وابتسمت له كأنها شايفاه، حس سليم بنبضة قوية جواه.. فجأة، كان في وعي سليم الذكرى، اللي لسه واقف قدام رهف، يتفاعل معاها بشكل تلقائي، زي ما حصل في الماضي.

كان قادر يشوف المشهد من منظورين مختلفين في نفس الوقت.. سليم الذكرى كان بيتكلم وملهوش قدرة انه يتدخل فمسار احداثه، لكن سليم الحالم كان واقف بعيد بيفتكر اللي بيقوله وكل حاجة قالها كانت بتعمل فجوة ادايه بينه وبين رهف، وكان الحوار الداخلي ده بيحاول يوصل له حقيقة معينة.. او انه محتاج يعمل حاجة معينة.

سليم الذكرى وهو يقول لرَهْف، "منكرش أني شبه السكر المرّ فعلا..." لكن الحالم بدأ يبتهت الكلام في مسمعه ويقطع، وبدأ جواه إحساس إنه عايز يتدخل في الحوار ده، يوقف نفسه من التفوه بالكلمات اللي عارف إنها هتزد

المسافة بينه وبين رهف.

لكن بمجرد ما يحاول يقول أي حاجة، لقي نفسه بيدخل في صراع داخلي، بين إنه يسبب الذكرى تمشي في مسارها الطبيعي وبين إنه يحاول يغيرها. حاول يتكلم، يحذر نفسه من اللي هيقله، بس صوته طلع همس ضعيف، زي صوت مبسوح بيحاول يصرخ من أعماق بحر. كان فيه حاجة جواه بتقله إنه لازم يتقبل الماضي، لكن كان مُصر انه عايز يغيره، يحاول يصلح اللي اتكسر.

سليم الحالم كان بيتحرك ببطء وسط الذكرى، بيحس وكأنه مربوط بسلاسل خفية، مش قادر يتحكم في جسمه ولا صوته. كان بيشفو سليم الذكرى وهو بيتكلم مع رهف، والكلمات اللي كان بيقلها كانت زي سكاكين بتقطع جواه، "عارف اني مش كفاية، وانا مش زيك معنديش صحاب كتير مش زيك، ورغم كده بقولك دايمًا متخلينيش انا الشخص الوحيد القريب منك عشان لو جه يوم ومشيت او حصلي حاجة."

كل محاولة منه للتحرك كانت بتزيد من إحساسه بالعجز.. مع كل خطوة بيحاول ياخدها في اتجاه سليم الذكرى، كان بيحس بالألم بيمزق عضلاته، وكأن جسمه بيقاوم أي محاولة لتغيير اللي بيحصل. ومع كده، فضل يحاول، ييزود صوته بالتدريج.. وفي اللحظة اللي صوته بدأ يرتفع فيها أخيرًا، وبيحاول يقول، "لا، ماتقولش كده..."، سمع فجأة أصوات غريبة بتتوالى في دماغه. مشوشة، زي همسات بعيدة، بتكرر كلمة واحدة، "اخرج... اخرج... اخرج..."

حس بحاجة بتسحبه من جواه، وكان فيه قوة غير مرئية بتشده تاني برا الذكرى، بتبعده عن الموقف اللي كان عايز يصلحه.. وقبل ما يقدر يعمل أي حاجة، حس بجسمه بيتحرر فجأة، وفي اللحظة دي.. يصحى فجأة على كرسي البلكونة على العصر، بيتنفس بسرعة وكأنه كان بيجري في سباق. فضل.. مدهوش وهو بيص حواليه وكل حاجة اختفت وكأنها لم تكن، لسه بيحاول يستوعب اللي حصل.

كان عقله مشوش، مش قادر يفرق بين الحقيقة والحلم.. فضل يردد فداغاه هل ده كان مجرد حلم عادي؟ ولا هو دخل مكان غريب عن الواقع اللي عايش فيه؟

الشعور بالواقعية كان شديد لدرجة إنه بدأ يشك في كل حاجة.. بقي قاعد في مكانه في البلكونة، بين الماضي والحاضر، بين الحقيقة والخيال، بيحاول يفهم إذا كان ده فعلاً مجرد حلم ولا حاجة أعمق بكثير. هل لو غيرت حاجة هناك ممكن تتغير فالواقع؟

لما رهف مسكت إيده في اخر الذكرى وقالت له، ”بتقول ان محدش بيحبك، بس أنا بحبك“، سليم الحالم حس بشعور مختلط بين الراحة والألم.. كان عارف إن اللحظة دي كانت حقيقية، وإنها فعلاً قالت له الكلام ده، بس كان لسه بيحس بالثقل اللي جواه، وبيسأل نفسه لو الحب ده كان حقيقي ولا مجرد كلمات منثورة.

١٩ سبتمبر ٢٠١٨

الساعة ٩ صباحا

”أحسن حاجة كان ممكن تعملها قبل ما تمشي؟ إنك تقولي لي العلاقة مينفعش تكمل عشان انتِ شخص سيء أو مش بتشوفي غير السيء في الناس، أو تقولي لي إنك مبقيتيش تحبيني.“

مشيتي يا رهف وانتِ بتقولي لي حاجة اسوء من كده بكثير، إني أحسن حاجة حصلت في حياتك وإني هفضل أقرب الناس بالنسبالك. طب إزاي فهميني؟ يمكن فهمي ليكي كل الوقت دا كان ضعيف او غلط.“

الباب بيخبط براحة، ”أيوة مين؟“

يتكرر الصوت الرقيق الي سليم سمعه من يومين تاني، ”أنا ليلي يا سليم.“

يقوم سليم من جلسته الخيالية مع نفسه ويفتح الباب. اتفضلي جوا يا ”رايقة“، اما أعملك حاجة تشريها.

ضحكت ليلي ضحكة خفيفة، وبصتله شويه وهي مبتسمة ودخلت.

سليم، ”قولي لي بقى ياستي، إيه اللي جابك تاني؟“

ابتسمت ليلي، ”انت كنت بتكلم نفسك ولا إيه؟“ رد عليها بنبرة إحباط، ”لأ، أنا كنت سرحان في الذكريات بس.“

ليلى، ”طب خلي بالك ان الذكريات والمشاعر ممكن تجيب الواحد لمرحلة من التفكير العميق والشroud، وساعات الاكتئاب.“

لو هتفضل مكمل كده يا سليم ومحتاج أي مساعدة في أي حاجة متنساش أني هنا، حتى ولو العلاقة بيننا مش أحسن حاجة دلوقتي.

## عم السكوت شوية وكملت ليلي كلامها

عموما انا جيت عشان وحشتني يا سليم، مش لازم أبقي عاوزه منك حاجة عشان أجي يا خفيف.

سليم، "عارف إنك هنا، بس عمر ما الكلام كان حل ومعتقدش إن فيه أي حل للي أنا فيه أصلاً، وبعدين انت عارفة أصلاً من ساعة ما كنا مرتبطين انك مبتعريفش تطليجني مني بكلمتين على بعض، هنستعبط ولا ايه؟"

ردت ليلي، "يمكن الكلام مش حل، بس وجودي هنا دلوقتي يمكن يفرق شوية.

حاول تفكر في إنك تبدأ من جديد، حتى لو خطوة صغيرة." بصلها سليم وسكت شوية وكمل كلامه، "ما علينا، وعموما لأ مش لازم تبقي عاوزه حاجة، بس معتقدش إن عندي قدرة نفسية أدخل في علاقة تاني.

وانت أكيد عارفة من يُسرى أنا بقالي أكثر من شهر عامل إزاي، بعد ما سمعت...  
ليلى، "سمعت إيه؟"

سليم (بنظرة حزن)، "بخبر خطوبة رهف.

من ساعتها وانا بدأت أبص للموضوع ببصّة إن أنا اتنسيت بالسهولة دي؟ أنا بقالي شهر وأكثر في الحال المهيب ده، وهي واخدة الحياة إزاي ايزي بيزي كده؟

أنا مش بحسدها، بس ليه؟ ليه تقولي كلام زي ده وبعدين فجأة ألاقها اتخطبت وكأني معديتش عليها في حياتها قبل كده؟

أنا عارف إن أنا السبب في كونها بعيدة دلوقتي، بس من ساعتها وأنا ندمان. مش بحسدها لا، بس ليه هي فرحانة أوي بالأخص في عدم وجودي، وأنا قضيت كل الشهور دي بندم وبفكر فيها من ساعة ما بعدنا عن بعض في مارس؟! "

## ليلى تسكت شوية وتكمل كلامها

محدث هيقدر يفهم اللي جواك يا سليم طالما انت مش فاهم مشاعرك، مش فاهم ليه انت متضايق، طالما انت مش متأكد من حقيقة مشاعرك فعلا.

سليم (مشفقاً على نفسه)، "يمكن عندك حق. بس أوقات بيكون صعب جداً إنك تفهم مشاعرك لما تكون غارق في الكتابة وعدم اليقين. بحاول، لكن الموضوع مش سهل."

ليلى، "عدم اليقين من....؟"

يرجع بظهره لورا وياخد نفس عميق ويرد عليها، "عدم اليقين من كل شيء، ومش قادر أحدد إذا كنت فعلاً عايز أو اصل الحياة زي ما هي ولا أغير حاجة. مش عارف حتى أقدر أخرج من الحالة اللي أنا فيها أو أبدأ صفحة جديدة."

ليلى، "انت بتفكر مثلاً إنك فيه إمكانية ترجع رهف رغم إنها اتخطبت؟"

سليم، "مش عارف. في الوقت الحالي، فكرتي مش واضحة، لكن لما سمعت خبر خطوبتها حسيت بصدمة."

يمكن أكون عايز أرجع بس مش عارف إذا كان ده ممكن أو حتى إذا كان له معنى دلوقتي."

ليلى، "ده طبيعي، لكن هل فكرت إنك تحاول تحكي معاها؟ حتى لو صعب. يمكن تكتشف إنها لسه مهتمة بإنك تكون جزء من حياتها." سليم (بانفعال)، "هتبقى مهتمة بيا ازاى وهي مخطوبة دلوقتي؟!"

من برا حاسس اني المفروض ابعدها واسيبتها تعيش حياتها بسعادة، بس من جوايا نفسي اننا نكون مع بعض تاني، قريبين، صحاب عاديين مش أكثر حتى بس تكون مشاعرنا صادقة زي الأول.

ممكن يكون عندك حق، بس الخوف من الرفض واللوم وفوات الاوان  
بيخليني مش عارف...

وفجأة غير الموضوع وقاطع كلامه،

بقولك يا ليلي..

مفيش مرة نمتي فيها دخلتي حلم شبه الممر كده وكل اللي حواليني عبارة عن  
جدران ضباب؟“

ليلى، ”جدران.. ايه؟“ ”يمسح على وشه، ”لا ولا حاجة.. كملي كنتي هتقولي  
ايه؟“

” بقولك خد وقتك انك تدور على الشجاعة انك تواجهها بمشاعرك، يلا  
هقوم انا بقا عشان عندي شغل.“

سليم بصوت واطي بيقول لنفسه، ”حتى الجواب لسه مكون على  
المكتب.“ تبصله وهي ماشية، ”بتقول حاجة يا سليم؟“

سليم (باحباط)، ”لا ولا حاجة، تصحبك السلامة.“

## ٢٦ سبتمبر ٢٠١٨

سليم يفتح عينيه ثاني كالعادة، بس فعالم ذكرياته..  
ويلاقي نفسه الذكري ادامه وبتكلمه، "عارف يا سليم، إيه مشكلتك؟ انت  
واقف في نص دايرة، مدار من الذكريات والآلام وعدم التحرك الغير منتهية.  
لا منك عارف تاخذ خطوة وتواجه رهف بمشاعرك... مشاعرك؟ انت مش  
عارف انت عايز تقولها إيه أصلاً.

عايز تتأسف؟ ولا عايز ترجعوا صحاب ثاني بعد ما الوقت فات؟ طب  
هتتأسف على إيه ما هي مبسوسة أهي؟

انت اللي مش مبسوط.  
وليلي، طول ما انت عالق في الدايرة دي، عمرها ما هتقدر توصل معاك  
لحاجة.  
هتسيبها هي كمان تدخل في حب وحنين من طرف واحد وتتأذى لأنك  
شخص غير مسؤول وجبان.

فوق يا سليم!

ونفسه الحالمة ترد عليه، "مقدرش... مش قادر أفوق.  
أنا مُدرك مشاعري... بس مش قادر أتقبل حقيقة إني اتنسيت، ولا كآني كنت  
في حياتها مرة.  
رغم إني كل الفترة دي بلوم نفسي وعايز أصلح أي حاجة بس مقدرتش.  
بس لو دي مشاعري فعلاً، هل عمر ما هيكون فيه حل؟  
أصل أنا هعمل إيه، هروح أقولها، انتِ نسيتيني اوي كده؟  
ولا أقولها، مبسوسة مع الجديد؟

انت عبيط؟

بيجاوبه سليم الذكري،

”لأنا مش عبيط، بس أنا كان نفسي متنسيش.  
كان نفسي أبقى فارق.“

يمكن دي المشاعر اللي محتاج أواجهها بيها فعلاً، بس خوفي هيبقى دائماً  
المانع ليا.“

”يرد عليه، ”خوفك من اللوم؟“

بترد الذكرى عليه تاني بنظرة أسف، ”لا، خوفي إني يتقالي انت اللي مشيت  
والحياة موقفتش عليك.  
بدل ما يتقالي انت فارق، وعمرك ما هتكون اتنسيت.  
وحتى لو اتقالي الرد اللي أنا نفسي فيه، هحسه مبتدل وأبعد ما يكون عن  
الحقيقة...“

يقطع كلامه.. ويقول الحالم والذكرى فنفس الوقت، ”لأني عارف الحقيقة...  
ومش قادر اتقبلها.“

”اخرج.“

ويصحى،

عالق...

بين الخيال المتحرر والواقع الضعيف.

## الرابع من مارس ٢٠١٨

في الماضي،

سرحان زي العادة، في دنيا ثانية خالص والجو حواليه كان هادي... بس عقله كان مليون ضوضاء.

دماغه كانت بتتنطط من فكرة للتانية، مش قادر يركز في حاجة معينة. فجأة، سمع صوت واطي جاي من بعيد، كأنه خلفية خواطره، مفيش حاجة كانت واضحة،

وفي نص الكلمات اللي مش مترابطة، "تعرف إن جمالك ولطفك يوم عيد ميلادي أنا لسه مش قادرة أخطاه؟ اللي هو ازاي، إزاي كنت حلواوي كده؟"

سليم حاول يركز أكثر، بس برضو مسمعش كويس... الأفكار كانت ماسكة فيه، مش مدياله فرصة يفوق.

صوتها ظهر تاني، بس المرة دي كان أوضح شوية، "قولي بقى، ناوي تتجوزني إمتي؟ ده حتى بابا بيقولي سي سليم بتاعك مش ناوي يتحرك ولا إيه."

سليم اتخبط فجأة من الصدمة، وفاق من عالم خياله.  
سليم (بدهشة)، "اتجوز؟!"

بدأت أفكاره تتخبط جوا دماغه، وكأنه وقع في دوامة،  
أنا ازاي وصلت للمرحلة دي؟ أنا ماكنتش عايز أعمل كده، أنا وعدت نفسي متعمقش في علاقة مع حد تاني للدرجة دي... لازم أرجع ورا.

الهدوء عم فجأة في دماغ سليم وبص لرهف بنظرة كلها ارتباك.

سليم، "رهف... أنا معرفك قبل كده إني شخص مستنفذ عاطفياً ومقدرش أقدم في العلاقة حاجات كتير، صح؟"

رهف (بتستغرب)، "أيوه، ليه؟"

سليم، "أنا وصلت لجزئية في علاقتنا كنت ناسي قبلها إني مش مستعد أربط نفسي بجد عاطفياً تاني.  
نسيت قراراتي ومبادئ وطاقتي اللي فعلاً منتهية."  
رهف وقفت في نص الشارع، وبصتله بحيرة، "يعني عايز توصل لإيه في الآخر؟"

سليم سكت شوية، خد نفس عميق وقال، "محتاجين نرجع لورا شوية يا رهف.

مش كنا بس أصحاب من كام يوم؟  
إنتي أقرب الناس ليا بجد وأنا بحبك جدًا بس... بس أنا مش مستعد إني أرتبط عاطفياً بجد.

عشان كده كنت بقولك دايمًا اتصاحبي واعرفي ناس في الكلية، عشان لو حصل ومشيت أو بعدت في يوم متحشيش إن كل حاجة كانت متمحورة عليا."

رهف بصتله بعصبية وزقته وقالت، "على فكرة بقاء، أنا مش محتاجة حد وانت مش محور الكون!  
محدث طلب منك تنسى وتسرح زي عادتك وتديني آمال إن احنا..."

سليم (مقاطعًا)، "إن احنا إيه يا رهف؟"

رهف، "إن بينا حاجة... بس ظني مطلعش في محله للأسف."

سابته ومشيت، وفضل سليم واقف في مكانه، مش عارف اللي عمله صح ولا غلط، مش قادر يخير نفسه بين راحتة النفسية ومشاعر رهف.  
مش قادر يتحرك أو ياخذ قرار.

كل اللي دار في دماغه كان مزيج من الندم والارتياح.  
في جزء منه كان عارف إن اللي عمله كان صح، إنه محتاج يحافظ على نفسه وميدخلش في حاجة مش مستعد ليها.  
لكن الجزء الثاني كان بيلومه، بيلومه على إنه سبب لرهف ألم كان ممكن

يتجنبه لو كان موضح أكثر من الأول.

الدنيا كانت بدأت تضلم حواليه، الشارع هادي، بس في عقله كل حاجة بتصرخ. سليم بدأ يمشي على مهل.. زي التايه.

حاول يقنع نفسه إن قراره كان لمصلحتهم هما الاتنين، وإنه لو كان كمل معاها كان ممكن يوصلوا لحتة أسوأ.

وصل للبيت وفتح الباب بشويش، وكأنت أنفاسه ثقيله من اللي حصل. رمى نفسه على الكنبة، وكل اللي قدر يعمله إنه يقفل عينيه ويحاول يهرب من أفكاره، بس مفيش فايده.

صوتها وهو بيتردد في عقله، نظرتها اللي كانت مليانة خيبة أمل، وكل لحظة فاتت بينهم، كانت بتحصره من كل ناحية.

كان عارف إنه لازم يواجه أفكاره

هو انا فعلاً عملت اللي كان لازم اعمله، ولا انا بهرب من حاجة؟  
دا السؤال اللي فضل يزن فماغه طول الليل.

لكن مهما كانت الإجابة، سليم كان متأكد من حاجة واحدة، هي ان العلاقة دي اتكسرت، ومفيش رجوع تاني.

مع كل الأفكار دي، سليم قرر يكتب جواب لرهف، يوضح فيه كل حاجة جواه.

قعد وكتب الجواب، كلمات ثقيلة خرجت من من ايده بس مخرجتش من قلبه، وحطه على المكتب عشان يبقى جاهز يبعته في يوم من الأيام، لو قدر يواجهها.

رهف ،

أنا عارف إن انا خليتنا نبعد عن بعض ، لكن حاسس إنه كان لازم أقولك كام حاجة. أنا بجد آسف لو كنت خذلتك أو لو كنت متناقض فمواقفي. الحقيقة إني اكتشفت حاجات عن نفسي كنت مغمض عنها ، وده خلاني أتصرف بطرق مش دايماً واضحة .

أنا مش هطلب منك تسامحيني ولا تفتكريني أو حتى ترجع علاقتنا زي ما كانت ، كل اللي عايز أقوله إنك كنتي جزء مهم من حياتي ، وإن حتى لو الظروف خدتنا بعيد ، فذكرياتنا هتفضل معايا .

ماكنتش عايز أديكلي أمل كاذب ، لكن عايزك تعرفي إني كنت دايماً بحاول أكون صادق ، حتى لو مش دايماً كنت ناجح . أرجوك ما تفتكريش إنك كنتي سبب في أي حاجة وحشة حصلت .

أتمنى تكوني بخير وتلاقي السلام اللي أنا بحاول ألاقيه ، متنسينيش .

**صديقك العزيز (سابقاً) ، سليم .**

أما دلوقتي ، سليم قفل عينيه ، وكل اللي تمناه إنه يقدر ينام .. ويقفل بوابة الندم ولو لساعة .

الفصل الثاني  
بداية أمل

إلا الدهرُ حتَّى المَوْتِ مُصْحِبِهِ، أَلَّا ظِلَالِ  
يَأْسٍ بَارِدَةٍ

وَالْمَوْتُ بَعْدَ الدَّهْرِ يَبْقِينَا، ذَكَرِيَاتٍ بِالْأَزْهَارِ  
بَاهِتَةٍ

لَيْسَ أَحَقُّنَا بِالْوُرُودِ أَحْيَانًا، وَدِمَاؤُنَا عَلَى  
الْأَوْحَالِ رَاكِدَةٍ

## أكتوبر ٢٠١٨

عدت أيام سليم بهدوء أكثر مع بداية ليلى إنها تعدي عليه كل كام يوم عشان متسيبوش لأفكاره السوداوية ومشاعر الندم والحنين، وأحلامه كانت اقل الفترة دي.. بس مكانش فاهم ليه.

تزور ليلى سليم في التاسعة صباح يوم الخميس، وميقاش سليم يتفاجيء بزياراتها زي الأول، تدخل ليلى ويقعدو فالبلكونة مع ضوء الشمس الخفيف وكوبايتين الشاي بالنعناع.

سليم يبدأ يحيي، "تعالى بقا يا ستي، فاكرة يوم ما عملت حادثة؟ شعور الموت دا طلع لذيد الصراحة. اللي هو حرفياً مش بتحسي بحاجة أصلاً بس بتختفي فجأة كده من الوجود، بنتتهي فجأة كل مشاكلك من ادامك. مش عارف ليه الخبطة مجتش أقوى شوية، كان زماني تمت وخلصت." ليلى ترد عليه بانفعال، "ارحم أمي العيانة من سيرة موتك، مش موال هو. وكمان لا كنت هتشوفني ولا هتعرفني لو تمت ساعتها، كنت هتبقى مبسوط كده؟"

سليم يبتسم وبضحكة خفيفة يقولها، "هه، أشوفك. أيوة فاكر أنا اليوم ده، كنت قاعد فنص الجامعة بحاول أقرأ الأشعار اللي بكتبها وسمعتيني صدفة.

جيتي بابتسامتك الرقيقة وشخصيتك الجريئة الي وقعت قلبي فجمالك ساعتها تسأليني هو أنت الي كاتب الحاجات دي وقعدتي جنبي وأنا بحاول أقرأهالك، وفي الآخر بعد ما اليأس خدني اديتك الموبايل تقريها إنت."

ليلى تبتسم وتقوله بلامح بريئة، "ووقتها اتعرفت على ألطف إنسان فالوجود.

طبعاً اتبين بعد كده إنه حلوف بس هنعديها عشان مبوظش الجو."

سليم، "ألف شكر يا بنت الناس، والله مش عارف من غير صراحتك كنت هعمل إيه.  
المهم بقا... " تقاطعه، "إيه المهم؟"

يسكت شوية سليم ويفكر هل المفروض يسألها السؤال الي شاغل باله ده ولا لا.

وياخد قراره ويقولها بجدية ممزوجة بهزار،  
"مش ناوية تتخطي إنتِ كمان بقا ولا إيه؟"

ليلى (بنبرة ساخرة)، "اه انت متعرفش بقا، ما التراوما اللي حضرتك جبتها لي لسه معلمة فيا يا خبيتها، قلتلك مرة إني لسه شايفاك." سليم، مدعيًا البراءة،  
"أنا؟! ده أنا غلبان والله، إنت مكبرة الموضوع جامد."

ليلى،

"إنتِ إيه يا عسل؟

ده إنت جيتلي برجليك بقا، ده أنا أجيب تاريخك كله ومصايبك وانفعالاتك الغبية وبرود دمك من أولهم لآخرهم.  
يا أخي، ده إنت حتى مفكرتش فمرة تجبيلي وردة." سليم، "بنسى، او بكسل الصراحة، بس متنكريش اني عمري ما استخسرت فيكي حاجة صح ولا ايه؟  
وبعدين مش هنعيد فأم الموضوع ده كل شوية، قلتلك ان ده كله مجاش لوحده، محدش بينفعل ويتعصب غير لو كان الي ادامه لا مؤاخذه غبي."

ليلى ترد بابتسامة، "ياسيدي ماشي انا ساعات بطلع غلطانة، بس بغض النظر عن ده فين الورد؟ فين الاهتمام؟ هو كل حاجة فلوس وأكل؟"

سليم (مازحاً)، "ساعات اه، ضحك.

بقولك ايه اصطبحي كده، انا عندي اکتئاب بقالي كذا شهر ومحدش عبرني لا بوردة ولا بسندوتش شاورما، ومحدش هيعبرني غير لما أموت غالباً، ده لو لقيت حد يحطهالي على قبري يعني..."  
ليلى تقوله بدلع،

”يا خفيف انا مالي ومالك.

أنا بنت رقيقة تعاملني معاملة البسكوتاية وتجيبلي ورد كثير وشوكلاتات.“

من زمان وهي في عيون سليم وقت فترتهم سوا زي الجوهرة اللي بتلمع فوسط الضلمة، قطعة فنية نادرة بتجسد بالنسباله كل معاني الجمال والراحة والأمان.

شعرها الأسود اللي بيتراقص بهدوء مع نسيمات الهواء، كما لو كان خيوط من السحر.

عيونها البنية الواسعة، كانت تحتوي على عمق هادئ، كأنها تحمل في طياتها أسرار الدنيا وعدوبتها.

ابتسامتها اللي بتتسع فجأة كانت شبه أشعة الشمس اللي بتنساب على الزهور في صباح ربيعي، كانت تمنح الحياة لأيام سليم. كل حركة منها كانت لطيفة بتخلق جو من السكينة والجُراة.

صوتها الناعم، اللي كان شبه همسات الرياح جوا الأشجار، كان بيملاً المكان بآثار راقية من الأمل والحنان.

كانت بتغمر سليم دايمًا بأشعة من الدفء، الاحتواء والاطمئنان، كان رغم كل ده دايمًا يفتكر أن جمالها الحقيقي مكانش بس في ملامحها، بل في كل لحظة من وجودها، في كل لمسة منها، وفي تأثيرها العميق على روحه.

**يبتسم (بملامح الخباثة) ويقرب من وشها،**

”وانتِ عارفة طبعاً باكو البسكوت ده بيتحط فين؟ بيتحط في الجيب الي ورا ويتقعد عليه يتفتت مية حته.

**يرجع تاني بظهره لورا**

وأنا ميهونش عليا ليلي تبقى نفسها في حاجة، نعاملك معاملة البسكوتة.“

**ليلى تضربه على كتفه وتقوله بانفعال،**

”هو يا كده يا كده؟! خلاص مش عاوزه.“

سليم يضحك لأول مرة من قلبه من فترة طويلة ويقولها،  
 "أنا بقول كده برضو." ليلي تتفاجيء بفرحة، "فيها من زمان الضحكة دي يا  
 أخي؟

هرمنا والله، ياجدع استنى اما اصورك دي لحظة تاريخية!"

ويكمل سليم ويلي باقي وقتهم هزار وكلام في ذكرياتهم سوا بعيدا عن سلبيات  
 ايامه،

لحد ما ليلي يتأخر وقتها وتقوم تودعه الى لقائهم القادم.

أصبح سليم لا تمسُّه بسمه إلا بوجود ليلي في يومه، ولكنه لسه منسيش عدم  
 تقبله لحقيقة نسيان رهِف لكل أيامهم وذكرياتهم مع بعض، ومغابش عن باله  
 حوار أحلامه رغم انه مكانش اتكرر من فترة قريبة.

بس لسه سليم رغم كل ده مَادركش ان الي بيدور عليه التقبل والتخطي لبداية  
 جديدة، مش البحث عن الحل لمشكلة لم توجد.

## ٩ أكتوبر ٢٠١٨

سليم بعد كام يوم من غير ما ليلى تعدي عليه، مكانش عارف ينام من اخر يوم زارته، الأرق كان سايبه في حالة سيئة.

آخر اليوم الساعة ٩ بالليل حس إنه خلاص هيبدا ينعس شوية بشوية، بس قبل ما يغرق في النوم، جاله تخمين عن ازاي بيخش أرخبيل الذكريات تاني. جرب يفكر في كل الحاجات المؤلمة اللي كان بيمر بيها، وتذكر رهف ووالدته وسارة وزمايله اللي كانوا بيتنمرو عليه. غرق في التفكير في الذكريات المؤلمة وكل الحاجات اللي كان عايزها تكون غير ما هي عليه دلوقتي.. ونام.. وهو غرقان في أفكاره المؤسفة.

صحي سليم بعد شوية، لكن للأسف لقي نفسه في سريره تاني عادي، وماحلمش بأي حاجة.

حاول يقنع نفسه إنه يمكن هو ماكانش عارف إن الموضوع هيطلع صعب كده، وقرّر إنه يمكن هو لقي حل أو عمل حاجة في الأرخبيل تساعده يخلص من الأحلام دي، أو تطرده من العالم ده.

قام من السرير وطلع يقعد في البلكونة عشان يشوف نجوم الليل، لكن.. كان ادامة ولا حاجة..

كل حاجة برا البلكونة كانت عبارة عن سواد.. حاول يدخل إيدته في السواد، فاختفت، ولما خرجها لقاها تاني.

ساعتها فهم سليم إنه فعلاً نجح يدخل الأرخبيل، بس المرة دي كان مختلف. موجودش الجدار الضبابي، ولا دخل ذكرى معينة، ولا شاف نفسه في الذكرى، كان كل اللي حواليه شقته الصغيرة وسواد في كل مكان.

ماكانش عارف يعمل إيه.. حاول يخرج من الشقة ويدخل في السواد ببطء وحذر، مشي شوية على أمل انه يلاقي حاجة.. بس بدأت الأفكار تدور في

دماغه..

والذكريات اللي فكر فيها قبل ما ينام بدأت تدور حواليه.

سمع أصوات غريبة ومزعجة بتتوالى على مسمعه.. "انت ليه هنا؟"،  
 "بتضحك على إيه؟"، "زعيق.."  
 أصوات ضحك عالية.  
 "انت مش محور الكون يعني!"، "شكلك بتتفرج على كرتون كتير."  
 "الحب مجرد وهم!!"

معاناته زادت، مقدرش يستحمل، "اسكتوا بقى! بس... بس!!"  
 الأصوات بدأت تتلاشى ببطء.. وبعدها يفتح عينيه، وشال إيدته من على ودانه.

لقى نفسه في ذكرى مع ليلي، اليوم اللي شافها فيه لأول مرة وهي بتسأله عن  
 أبيات الشعر اللي كان بيحاول يقرأها.  
 قال لنفسه بنبرة مليانة إحباط، "أسف إني خذلتك، وإني كنت بارد ومش  
 كفاية، وباخذ منك أكثر مما بديكي، اسف لما كنت عارف إنك فيوم هتزهقي  
 مني وتمشي بسبب تصرفاتي اللاإرادية ومقدرتش أقولك ده.. بس انت هنا  
 دلوقتي فأتلمسيلي الأعذار المرة دي."

بصت له ليلي في الذكرى، وابتسمت.  
 ردت عليه لكنه ما قدرش يسمع كلامها، كان كل اللي شايفه حركة شفايفها  
 بس.

حاول يتحرك ويقرب منها عشان يسمع، لكن ما قدرش يتحرك مقدار إنش من  
 مكانه.. وبمجرد ما غمض عينه وفتحها، لقي نفسه رجع لممر الضباب تاني.

يمكن أنا المفروض أدور على حاجة معينة؟ أكيد الأرخبيل فيه سر، بس أنا  
 مش قادر أفهم... ليه بدخل مكان زي ده ومحدث تاني قدر يدخل.. وليه  
 الذكرى دي بالذات؟ وليلى كانت بتحاول تقول لي إيه؟!

قعد على الأرض وبدأ يفكر بعمق أكبر.  
 ممكن أعمل إيه عشان أطلع في الوقت اللي أنا عايزه مش اللي الذكري  
 عايزاه؟؟ إيه اللي بيخلي كلمة "اخرج" تظهرلي؟ هل المفروض أدور على ذكري  
 معينة؟ هل ده مرتبط بمعاناتي في عالم الواقع؟

أسئلة كثير وأجوبة قليلة.  
 بدأ يبص حواليه في مشاهد الذكريات المتناثرة والمتصلة بمقابض الأبواب  
 على الجدران.. قام وتمشى في الممر، بس مهما يمشي مكانش لاقى نهاية.  
 عينه وقعت على مكان في الجدار كان فيه مقبض باب، لكن كان مخلوع  
 ومتروك مكانه فجوة.  
 قرب منها بهدوء، لأنه مش عايز يقع في ذكري تانية مش المفروض يكون  
 موجود فيها لحد ما يكتشف سر الأرخبيل.  
 وأول ما قرب وحاول يبص جوا الفجوة، زي ما توقع، اتسحب جواها من غير  
 إرادته.

يفتح سليم عينيه، ويلاقى نفسه في نفس السواد اللي كان محيط بيه في أول  
 الحلم.  
 لكن المرة دي كان فيه هدوء تام.. بدأ يسمع أصوات خافتة، مش واضح هي  
 بيتقال فيها إيه أو مين اللي بيقولها.. فضل يتمشى ويحاول يقرب من مصادر  
 الأصوات دي.

بيقول،  
 ببطء.. بدأت تظهرلي أجزاء متقطعة من مشهد ذكري ما، والصوت بدأ يبقى  
 مألوف.. كان صوت رهف، بس كنت كل ما أحاول افكر أي حاجة مكنتش  
 بعرف، كأن الذكري دي ممسوحة من دماغي بلا آثار كافية عشان تتكون اداامي  
 بصورة كاملة.

نادى بصوت عالي: "رهف؟ رهف!! انتِ فين؟!!"

سمعتها بتقول جملة **كان حاسس إنه سمعها قبل كده**، "مش هتيجي تتغدى عندنا يا سيمو؟"

بدأ يسترجع أفكاره شوية، وبدأت الذكرى تظهر أمامه شوية بشوية، وسمع صوت **سليم الذكرى بيرد عليها**، "سيبك بس من الأكل دلوقتي، انتِ عارفة إني مش بعرف اوي اختلط بحد معرفوش وبتكسف. المهم يعني، إيه بقى رأيك في الخاتم؟"

**رهف بنظرة طفولية لطيفة**، "جامد بجد، كان محتاج مقاس أصغر شوية بس انا هحاول اضبطه." **رد عليها**، "عارف بس ملقيتش حاجة أنسب من كده، ومستغليتش بصراحة، فخايف إنه يبوظ أو يحصل له حاجة برضو، بس الراجل قال إن خامته كويسة نوعًا ما."

**ردت عليه**، "يا عم انت استنى بس ثواني، تتكسف إيه، هو أنت جاي تخطبني؟ اخلص بقى، محدش عندنا بيعض يعني." **سليم (معتزًا)**، "يا ستي مش حكاية يعض ولا ميععضش، إحنا صحاب، هاجي عندك وأبوكي وأخوكي موجودين أعمل إيه؟"

**رهف (ببراءة)**، "تتغدى."

قال: "يادي النيلة عليا.  
مش جاي، خلصناه حوار بقى."

الذكرى اختفت من ادم سليم. وظهر جزء تاني من الصورة فيه رهف وهي بتتكلم على التليفون بعيد شوية عن سليم الذكرى، "بينتي مش عارفة أقنعه ييجي، المشكلة إنه بيتعامل معايا كأني خطيبته بالظبط.

يعني شوفي الخاتم، الرواية اللي جابهالي حرفيًا اسمها 'حبيبي سكر مر' - حبيبي سكر مر!

لما بيقولي بحبك، شوفي بيقولها إزاي ونظرة عيونه بتبقى عاملة إزاي. بس لما ييجي عند حاجة أحاول أقرب أنا بيها أو أقربه من عيلتي، بلاقيه بيبعد،

أنا مش فاهماه.“

ف اللحظة دي، وأول ما خلصت كلامها، صحن سليم من غير ما يشوف كلمة "اخرج" المرة دي.

دقات قلبه كانت عالية، وعرق بارد نزل على جسمه، ونظره كان مشوش.

أدرك دلوقتي فعلاً.. إنه هو اللي بدأ كل حاجة، وهو اللي حط نفسه في دايرة العذاب دي.

كان بيوهم نفسه طول الوقت إنه مظلوم ويستحق نهاية أحسن من كده، بس كان نسيان رهن لكيانه أقل عقاب.

ما كانش عارف إذا كان دي آخر مرة يدخل فيها أرخبيل الذكريات ولا لأ، لكن اللي كان عارفه لحظتها إنه محتاج يعيد التفكير في كل حاجة... كل حاجة.

٢

نَرُوي بِهَا حُقُولَنَا، فَحَيْثُ نَدَفِنُهَا تُرَبُّهُ  
هَوَجَاء

تَرَآگَمَتِ خَوَاطِرُ مَآسِينَا، فَسَلَا قَلْبُ طَلَبِ  
الْوَفَاءِ

قَلْبٌ قَدِ آسَى، وَتَنَاسَى جُرُوحًا أَطَالَتِ  
الْبَقَاءِ

## ١١ أكتوبر ٢٠١٨

عدى يومين كمان وسليم لسه قاعد بيفكر، وكل حاجة رجعت تتلخبط في دماغه تاني.

اتصرف إزاي مع رهف؟ اتعامل إزاي مع نفسه اللي مش قادرة تتقبل ولا تتخطى؟ اعمل ايه فأرخبيل الذكريات لو رجعتله تاني؟ وهوصل لحد فين مع ليلى؟

لكن المرة دي كان الوضع مختلف. مكانش مكتتب زي الأول، بالعكس، كان في بداية مرحلة التقبل. بيحاول بصدق وييتقبل عواطفه وكونه بقى شخص مذنب، بس كان لسه ضايع.

بيكلم نفسه، "انا محتاج أوجه اهتمامي ناحية ليلى أكثر عمومًا. يمكن ده يخليني أنسى شوية، لأني عمري ما هقدر أصلح حاجة مع رهف. بس في نفس الوقت، أنا عارف إن ده مش حل، وعارف اني مينفعش ابقي بستخدم ليلى كبديل.. بس انا من جوايا فعلا بدأت احس انها الشخص المناسب بالنسبالي.

ده مجرد هروب، هروب من مواجهة نفسي ومن مواجهة رهف. يمكن موضوع رهف مابقاش مآثر فيا زي الأول، خاصة بعد ما ليلى بقت جزء كبير من حياتي تاني. لكن... لسه مش قادر أبطل أفكر. مش قادر أتجاهل إن اللي بعمله ده مجرد محاولة للهروب."

كان عارف جوا نفسه إنه مفيش طريق سهل للخروج من اللي هو فيه. سليم سمع صوت الباب بيخبط. هيكون مين يا ترى؟

صوت ليلى، "يا عم افتح، هو حد بيجيلك غيري اصلاً."

فتح الباب وهو رافع حاجبه بابتسامة، "وأى كمان يا عسل؟ دا اللي ناقص  
تيجي تعيشي عندي بالمرة.  
اتفضلي، تشربي شاي ولا قهوة؟"

ليلى ردت، "لا مش هقدر أشرب حاجة المرة دي للأسف.  
دخلت ليلى وقعدت وسليم مستغربها  
بص يا سليم، هقولك حاجة بس متزعقش وتقوم تجري ورايا في الشقة،  
تمام؟" سليم بنبرة متوجسة، "استرها علينا يا رب... هبتي إيه؟"

ليلى عضت شفايفها وبصت للأرض بتحاول متضحكش، "أنا أخذت  
الجواب اللي انت كتبتة لرهف من كام شهر، وبعته."

سليم، بنبرة تخلط بين التعجب والغضب، "إنتِ... إيه؟!"

ردت بسرعة، "متزعقليش، أنا عملت الحاجة الصح اللي عمرك ما كنت  
هتعملها.

وزودت كلام في الجواب، وكتبتلها عن مشاعرك وإحساسك إنك اتنسيت وإنك  
طول الوقت ده كنت ندمان وبتحاول تفكر إزاي تصلح اللي بوظته بس  
حسيت إن كل ده مالوش لازمة بسبب تخطيها ليك بالطريقة دي."

سليم حط إيدته على وشه بإحباط وسكت شوية، ليلى كملت، "أنا آسفة، بس  
مش عايزاك تفكر في حاجة مش مستاهلة.  
محدش يستاهل انك تستهلك نفسك بمشاعرك السلبية اللي بتتعامل معاها  
لوحذك."

كان قصد ليلى من جواها إنها عايزاه يبدأ حياة جديدة معاها هي، لكن  
مقدرتش تقول كده.

قال لها، "أنا مش عارف أرد على رهف إزاي لو شافت اللي اتبعث أصلاً.  
مش عارف أشكرك ولا أنضايق منك، بس عمومًا، شكرًا.

عندك حق فعلاً.. أنا ماكنتش هقدر أبعت الجواب ده ولو مرت سنين.  
بس ماكنتش مستعد يا ليلي إني أواجهها تاني، وأقولها كل المشاعر المكتومة  
دي.”

مسكت ليلي إيده وردت، ”كل حاجة هتبقى كويسة.  
انا معاك كده كده، عندك حاجة تخسرها؟“

سليم ابتسم وبص في عيونها.  
وفجأة، حصل الشيء اللي ليلي عمرها ما كانت تتوقعه، سليم حضنها، لأول  
مرة منذ معرفتهم لبعض.

كانت اللحظة مليانة مشاعر مكبوتة ومختلطة، مشاعر كانت مدفونة..  
وظلعت لأول مرة.

حضنه كان مليان امتنان، ارتياح، وحتى خوف من المستقبل.  
لحظة ما سليم حضن ليلي، كانت مشاعرها متلخبطة بين المفاجأة والفرحة  
اللي صعب تقدر تخبيها.

فترة كبيرة وهي بتدور على لحظة زي دي، إنها تكون قريبة منه بالقدر ده... انه  
يكون صادق فمشاعره بالشكل ده.  
اد ايه كان حضنه الدافي، الطاغي بمشاعر الامتنان والارتياح، بين مشاعره  
الصادقة اتجاهها.. وادها إحساس ان رجوعها كان قرار سليم.

كانت متخيلة إنها تفضل جنب سليم كصديقة، بس في اللحظة دي، الحزن  
ده خلاها تشوف احتمال جديد.  
قلبها ضرب بقوة، وحست لأول مرة إن فيه فرصة حقيقية إنه يشوفها بشكل  
مختلف.

المشاعر اللي كانت بتحاول تكتمها خرجت للسطح، بس في نفس الوقت،  
حست بضغط غريب، عشان متعرفش سليم كان بيحضنها عشان هو حاسس  
بالأمان معاها ولا عشان هو فعلاً بدأ يشوفها تاني أكثر من مجرد صديقة، بس

مكأنش فارق معاها أوي.  
كل الي كان فارق مع كيلي وسليم من بداية اللحظة دي.. انهم يفضلوا سوا  
أطول وقت ممكن.

بعد لحظات، قال لها بصوت هادي، ”شكراً على كل حاجة بجد يا ليلي، من  
غير وجودك، مش عارف كنت هتخطي اللي أنا فيه ده إزاي ولا إمتي.“

ليلى تبادلته الحضن، ودموعها على حافة الانهيار، ردت بصوت مطمئن  
ومرتجف، ”مفيش شكر بيننا يا سليم، أنا هنا عشانك، وأي وقت تحتاجني،  
هتلاقيني جنبك.“

## العاشر من مارس ٢٠١٩

عدت الأسابيع.. وحت سنة جديدة، موصلش أي رد من رهف لسليم، وفي يوم بعيد من أيام ربيع مارس الخفيفة على القلب، بيصحى سليم من نومه بدري بعد شروق الشمس.

يقوم يعمل كوباية الشاي بالنعناع في الأجواء المفضلة بالنسباليه، ويطلع يقعد في البلكونة اللي بقت ملاذة الوحيد من ضغوط الحياة. الريح الخفيفة كانت بتداعب وجهه وهو بيدشرب شايه ويفكر في حاله.

مقدرش يدخل أرخبيل الذكريات تاني طول الفترة دي، ومكانش فارق معاه عمومًا لأنه كان شايف انه خلاص وصل لنهاية سلسلة احلام الأرخبيل.

فكانت أول حاجة تيجي في باله هي إن الفلوس الي كان محوشها لمعيشته لوحده قربت تخلص، وبالتالي انه محتاج يرجع يشتغل تاني، لكن الحقيقة إن دي مكانتش المشكلة اللي بتشغله دلوقتي.

فكرة العودة للشغل نفسها كانت بتملاه بتردد.

هل انا فعلاً قادر اواجه الحياة تاني بعد كل اللي حصل؟

كانت فكرة إنه يرجع يتعامل مع الناس ويواجه العالم الي برا تاني حاجة مرعبة بالنسبة له.

دماغه بدأت تدور على الأفكار اللي كان بيحاول يهرب منها طول الفترة اللي فاتت.

مره أيام من ساعة ما الجواب اتبعت لرهف، ومفيش أي رد لحد دلوقتي.

كان كل شوية يبجي فباله أفكار صعبة التحمل والتقبل.

هل ممكن تكون همشتني خالص من حياتها ومن أفكارها وانا الوحيد اللي بغرق في أفكاره كده وبندم؟

القلق كان بياكله من جواه، مش بس عشان مفيش رد، لكن عشان إدراكه إنه بقى عالق في مكانه، مش عارف يتحرك للأمام ولا يرجع لورا.

يحس بالفراغ اللي بيكبر جواه، مع كل سؤال ملوش إجابة. مبقاش عارف يعمل إيه، مش بس عشان رهف ماردتش، لكن كمان عشان هو نفسه مش عارف يكمل إزاي. يرجع يبص لكوباية الشاي اللي في إيده، يحس إنها بقت ثقيلة عليه زي همومه.

وفي النهاية، الجملة الوحيدة اللي كان قادر يعبر بيها عن كل اللي جواه، "حاسس ان حياتي واقفة زي الفلوس اللي بتخلص، بس اللي فعلاً بيقتلني إن مفيش حاجة بتخلص جوايا."

سليم يقعد شوية باصص للفراغ، شايل هم أفكاره اللي مش بتوقف، وبعدين يقرر يفتح تلفونه ويتصل بواحد من معارفه القريبين، كونه عمره ما اعتبر حد صديق له فعلاً، وائل.

سليم بعد لحظة تردد، بيتصل بوائل.

الجرس يرن مرة، مرتين،

لحد ما وائل يرد بنبرة فرحانة، "يا أهلاً يا أهلاً! مين ده اللي فاكرني بعد كل الفترة دي؟"

سليم بيضحك ضحكة خفيفة ويقول، "يا عم وائل! مش مستحمل هزارك، عامل إيه؟ وحشتني والله."

وائل يضحك ويقول، "يا راجل متبقاش قفوش كده! وانت إيه الأخبار؟ مختفي كده ليه يا عم؟"

سليم بيحاول يخفي تعبته النفسي ويرد بصوت هادي، "والله يا وائل، ظروف الحياة بقا.

بس يعني إنت عارفي، مبقاش فيه جديد." وائل، "طيب يا سليم، ما تيجي نتقابل؟ نشوف بعض ونفك شويه؟" يحاول يرد على وائل من غير ما يبين الرفض، "آه والله، فكرة حلوة. بس... الظروف مش مساعداني أوي دلوقتي للأسف، يمكن قريب نتقابل."

وائل بحماس، "متفقين، بس على فكرة أنا برضو كنت عايز أسألك، ايه الدنيا في الشغل ماشية معاك تمام ولا ايه؟"

سليم بيتنهده، "بصراحة يا وائل، الدنيا مش ماشية أوي. الفلوس اللي كنت محوشها قربت تخلص عشان بقالي كتير سايب الشغل برضو، وأنا لوحدي هنا بعيد عن أهلي. تعرف حد ممكن يخليني أشغل معاه أي حاجة مؤقتة؟"

وائل، "طبعاً يا سليم، أكيد هلاقي لك حاجة. خليني أتكلم مع الناس اللي اعرفهم وأشوف، ومتقلقش أنا في ضهرك عمومًا."

سليم شاكرًا لاهتمام وائل، "كتر خيرك والله." وائل بضحكة خفيفة، "دا كلام! ابقى طمني عليك ياعم كل فترة، يلا مع السلامة."

يقفل وائل الخط.

يفكر سليم فكلامه، وفي فكرة إنه محتاج يرجع يشتغل تاني، بس الإحساس بالعجز بيخليه مش قادر ياخذ خطوة فعلية، ويقول في نفسه، محتاج أقوم على رجلي تاني عشان ليلي لو مش هيبقى عشاني.

بس للسما كأنه بيدور على جواب، وحي أو شغف. بس مفيش غير سُحْب خفيفة بتتحرك ببطء، زي حياته اللي مش عارف ازاي يحركها.

## ١١ مارس ٢٠١٩

في يوم آخر من أيام الربيع،  
والشمس كانت لسه مكسوفة وبتظهر بالكاد من ورا السحب، وقلبه كان تقيل  
زي كل يوم، لكنه حاول يقنع نفسه إنه لازم يبدأ يتحرك.

نزل من السرير واتجه للمطبخ، عمل كوباية شاي بالنعناع كعادته اليومية،  
لكن المرة دي قرر يغير عادته.

بدل ما يقعد في البلكونة كالعادة، قرر يقعد على الأرض في نص الأوضة،  
يحاول نفسه بالكرايب اللي كان دايمًا يقول إنه هيظبطها يوم من الأيام.

بدأ يشرب الشاي ببطء، وحاول يركز على حاجة جديدة، حاجة مختلفة عن  
كل الأفكار السوداوية اللي كانت بتلاحقه.

بعد ما خلص شايه، وقف وقعد يبص حواليه، وأخذ قرار بسيط إنه هيبداً  
بترتيب حاجاته.. يمكن ده يكون بداية لطريق مختلف.

بدأ ينصف المكتبة الصغيرة اللي كان سايبها تمتلئ بالغبار، مسك كتاب كان  
دايمًا بيحبه، رواية قديمة كانت بتدي له إحساس بالراحة، وقرر إنه يقعد يقرأ  
منها شوية.

ولكن أثناء قراءته، أفكاره كانت بتسحبه تاني.  
حاسس إنه مهما حاول يعمل حاجة جديدة، دايمًا بيلاقي نفسه راجع لنفس  
النقطة.

فكرة إن رهن متبعدهتش عنه بس جسديًا، لكن فكريًا ونفسيًا، الندم  
والأسف.. كلها مشاعر استمرت فملاحقته.  
لكنه قرر، حتى لو بصعوبة، إنه يكمل وميفكرش.

نام لحد العصر وقام خرج يتمشى في الشارع عشان يحاول يغير جو أيامه  
المعتادة.

أثناء تمشيته، شاف طفلة صغيرة قاعدة تحت شجرة وبتعيط.

قرب منها بحذر وسألها، "إنتِ ليه بتعيطي؟"  
رفعت رأسها وعينيها مليانة دموع وقالتله، "قطتي فوق الشجرة ومش عارفة  
أنزلها، وأنا خايفة عليها أوي."

سليم بص للشجرة وشاف القطة الصغيرة متعلقة بين الفروع، مش قادرة تنزل  
ولا تتحرك.

في اللحظة دي، حس بشعور غريب، كأنه بيتواصل مع الطفلة دي بشكل غير  
مباشر، زي ما هي مش قادرة توصل لقطتها، هو كمان مش قادر يوصل  
لحاجات كتير في حياته، بس العياط مساعدهاش فحاجة. قرر يساعدها،  
"متقلقيش، هننزلها سوا."

طلع سليم الشجرة براحة، وحاول يطمئن القطة اللي كانت مرعوبة، وبعد  
شوية من المحاولات، قدر يوصل لها وينزلها بهدوء.

لما نزل تاني للأرض، شاف الفرخ في عيون الطفلة اللي كانت لسه بتدمع وهي  
مبتسمة.

قالتله وهي ماسكة القطة في حضنها، "شكراً أوي." سابت القطة على الأرض  
وحضنته.

سليم حس بلمسة قلبية، كأن الطفلة دي لامست جزء من روحه.  
رغم كل المشاكل اللي كان بيمر بيها سليم يبتسم ويقول، "مفيش حاجة  
بتضيع لو حاولنا ننقدها"  
بينما راحت هي تلعب مع القطة، سليم قعدت على العشب بعيد شوية،  
والابتسامة مش راضية تفارق وشه.

حس إن اللحظة دي، البسيطة لكن المؤثرة، أعادته للحياة شوية بشكل أو  
بآخر.

الشمس بدأت تغيب ببطء، والدنيا حوالية بدأت تهدأ، والهواء الطيب كان  
بيداعب وجهه برفق.

سليم قرر يروح يمشي شوية على كورنيش النيل، يحاول يتخلص من التفكير اللي شاغله.

بدأ يمشي بهدوء على ضفاف النيل، وفي كل خطوة، كان بيحس براحة مختلفة. المنظر الجميل للنيل والأضواء اللي بدأت تنعكس على سطحه كانت بتهدئ عقله وتبعده عن المشاكل اللي كان بيمر بيها.

عند مقعد خشبي على النيل، قعد عليه وهو بيحاول يستمتع بالهدوء. فكر في اللي حصل فالיום ده، وفي إن اللحظة البسيطة دي كانت عاملة زي شرارة أمل.. حس إن الطفلة دي بفرحتها البسيطة خلت جزء من الروح المرهقة تنبض من تاني.

مع مرور الوقت، بدأت الشمس تختفي، وظهرت أولى نجوم الليل. كان لسه على المقعد، وراسه مايله لورا وهو باصص للسما، وكان عارف إنه مازال عنده مشاكل وصعوبات، لكن اللحظة دي علمته إن الأمل ممكن يظهر في أبسط الأمور، وإن الحياة فيها لحظات بسيطة تقدر تعيد الروح.

مع حلول الليل، سليم بدأ يرجع لفكره، لكنه كان في حالة من الهدوء الداخلي. قرر يروح البيت، عارف إنه يمكن يكون اليوم عادي، لكن لحظات زي دي بالنسبale كانت تذكرة لمدى تأثير الحاجات الصغيرة في حياة الإنسان.

## ١٣ مارس ٢٠١٩

سليم مستلقي على الكنب، عينية مثبتة على السقف، والأفكار بتدور في دماغه بدون أي ترتيب.

الموبايل رن مرة واثنين، لكن سليم ما أخذش باله على طول، وأخيرًا، في المرة الثالثة، قام من على الكنبه بتثاقل عشان يرد.

اول ما فتح سماعة التلفون يسمع صوت ليلي بحماس بتقوله، "البس وانزل بسرعة انا مستنياك تحت!"

سليم استغرب، لكنه لبس بسرعة التيشيرت الأسود والبنطلون الأسود اللي كانوا قدامه ساعتها.

وهو بيحط الشبشب في رجله، حس بلمحة من عدم الراحة، مش بس لأنه مش عارف هي عايزاه ليه، لكن كمان لأنه مكانش محب فكرة الخروج العشوائي مع ليلي لأنه كان عارف هي اد ايه متهوره.

نزل بسرعة ولقى ليلي مستنياه.

أول ما شافها، وقف لحظة.

كانت لابسة فستان أنيق، لونه أخضر غامق بيلمع، ببيرز تفاصيلها بشكل جذاب، ومعها حذاء بسيط بكعب قصير. شعرها كان مسدول على اكتافها وملموم شوية من قدام، وابتسامتها كانت مشرقة زي الشمس اللي طالعة بعد ليلة طويلة.

وقبل حتى ما تتاح لسليم الفرصة يسألها، "احنا رايعين فين؟"

خدته من إيده وقالته، "تعال يلا، رايعين مكان هتحبه."

سليم فضل متردد وهو ماشي معاها لحد ما وصلوا بعد شوية لمكان مش مألوف بالنسبale، كافيه أنيق وجميل.

ليلى دخلت بتلقائية واختارت اكر ركن هادي، وطلبت تشيز كيك ليها وليه وهي مبتسمة بارتياح.

سليم كان متضايق، مكانش مبسوط إنه قاعد في مكان زي ده وهو لابس حاجة بسيطة فمكان زي ده ومع ليلي وهي بالجمال ده، لكن كمان كان مضايق من فكرة إنه قاعد مع بنت عنده مشاعر ناحيتها وهي اللي بتعزمه.

بينما ليلي بتحاول تهزر وتخفف الجو، كان واضح إنها بتحاول تخرجه من حالة الهم اللي هو فيها.  
سليم كان حاسس إنه لسه بعيد عن المكان، لكن حاجة في جوا قلبه بدأت تتحرك.

يمكن هو مش عايز يعترف، لكن لحظة قعدته مع ليلي، رغم التوتر اللي حاسه، كانت بتأثر فيه.

ببطء، بدأ يلاقي نفسه بيدوب في الكلام معاها.  
مكانش مهم الكافية ولا التشيز كيك ولا لبسه، كان بس مهتم بوجود ليلي قدامه.

بتاخده من الحزن اللي كان غرقان فيه، وبتديله مساحة يحس فيها إنه مش لوحد، وإنه لسه في حد مهتم بيه، حد عايز يكون جنبه.  
العلاقة اللي كانت بتتكون بينه وبين ليلي كانت أعلى بكثير من أي حاجة تانية، كانت هي اللي بتنقذه من نفسه، حتى لو هو مش مدرك ده تمامًا.

في الكافية، الجو هادي والأضواء الخافتة تضفي لمسة من الدفء على المكان.  
تكسر ليلي الصمت وسألت سليم بنبرة جادة، "سليم، في شيء شاغل بالي من فترة. قبل سنة، سألتك رهن وقاللك، "هتتجوزني امتي؟"

سليم (يرفع نظره ويبان عليه التردد)، "أه، أنا فاكرك.  
في الوقت ده، كنت مشوش ومش عارف أتعامل مع الموقف، الأمور كانت صعبة بالنسبالي وماكنتش جاهز لحاجة زي كده ولا مخططها."

ليلي، "بس دلوقتي الوضع مختلف صح؟ إيه اللي تغير؟" يستنى سليم شوية قبل ما يجاوبها ويتنهد ويرد عليها، "مش متأكد إذا كنت جاهز لعلاقة جادة، بس عارف اني احسن دلوقتي."

ترد عليه ليلى بكل جرأة، "سليم، من يوم ما دخلت حياتي، حسيت بحاجات ماكنتش حاسة بيها قبل كده. انت علمتني حاجات كثير عن نفسي وعن الناس عموماً، كل حاجة بقت أحلى، أنت مش مجرد صديق أو حبيب، أنت الشخص اللي عايزة أعيش معاه باقي حياتي. عارفة إن الحياة مش دائماً سهلة، بس أنا واثقة إننا مع بعض نقدر نواجه أي حاجة.

سليم، هل توافق تكون شريك حياتي ونبني مستقبلنا مع بعض كزوج وزوجة؟" يجاوبها (بامتنان وتردد)، "أنا ممتن لصراحتك. حسيت إن الأمور بيننا مش واضحها مسار من الاول، وأنت فتحتيلي اني افكر بعمق أكثر. لكن، في نفس الوقت، أنا عايزك تكوني عارفة إني مش متأكد إذا كنت قادر أقدملك الحب اللي تستحقه ولا لا، أو يمكن أصلاً مش مقتنع بمفهوم الحب. شايف ان التفاهم والثقة والتقبل حاجات مهمة أكثر من الحب، وعارف برضو ان دي حاجة انتِ مش هتقدري تتقبلها لأنك مؤمنة أكثر بالحب."

ليلى، "وده طبيعي، والحب مش شيء يتم تدريبه، دي حاجة بتطور وتبروح وتيجي مع الوقت وانت بنفسك الي اقنعتني بكده يا سليم. وأنا مستعدة أكون هنا ونعدّي المرحلة دي مع بعض، المهم إننا نكون صادقين ونتعامل مع الأمور بشكل واضح." سليم (مليء بالأمل)، "انك تديني فرصة تانية تفهميني فيها وتحاولي تتقبلي شخصيتي المتقلبة. موافق اننا نبدأ ببطء ونحاول سوا نعمل حاجة حقيقية بيننا، بس محتاج وقت افهم فيه نفسي أكثر."

ليلى تبصله بنظرة القاتل الصامت وهي بتبتسم بهدوء، "بقولك ايه كده يا حبيبي يا عسل انت، ملكش وقت عندي، وتروح تجيبلي خاتم فضة وتخطبني بيه بكرة.

فاهم ولا نقول كمان؟" سليم يضحك، "يعني لو جبتلك خاتم فضة بكرة هتجيبني العيلة كلها على الفرح عشانه ولا ايه! ولا ناوية كده تعملي حفلة في الحارة ومهرك بكيس سكر؟"

ليلي تضحك بصوت عالي ويحط سليم ايده على بؤها يسكتها بسرعة،  
 "هتفضحننا بينت المجانين وطى صوتك!" تهدي ليلي وترد عليه، "خلاص،  
 إذا كان كده، نعمل حفلة في الحارة ونطلب من الجيران ييجوا يشوفوا مهر  
 السكر! بس بلاش ننسي نجيب قهوة وشاي للناس، عشان الفرح لازم يكون  
 على أكمل وجه."

سليم وهو يبيتسم، "ماشي ياعم، هشوف وائل عمل ايه فحوار الشغل بس  
 الاول.

دلوقتي يلا نروح، الوقت اتأخر "ليلي، تمام، يلا بينا!"

وينتهي اليوم، يرجع سليم لبيته، يريح على سريره من غير ما يغير هدومه  
 ويفكر فكلام ليلي، ميجهش فباله غير أفكار خفيفة ومرتبة لمرّة من المرات  
 القليلة بعد يوم موتر وغير مألوف زي ده.

موصلنيش أي رد من شهور، الاحلام انتهت، والصفحة اتقفلت..  
 اظن كده مبقاش من العدل لنفسيتي ولا لليلي اني افضل افكر فيها، خلاص  
 هانت

١٧ مارس ٢٠١٩

سليم،

أولاً، أنا عايضة أشكرك على الجواب اللي بعته. مكنتش متوقعة أسمع منك تاني بعد كل الوقت اللي فات. بصراحة، الكلام اللي قلته خلايني أفكر كثير في الماضي، في الذكريات اللي جمعتنا، كنت محتاجة وقت قبل ما ارد عليك. مفيش شك إن علاقتنا كان ليها مكانة كبيرة في حياتي، لكن الحقيقة إني اتغيرت كثير بعد ما بعدنا عن بعض. أنا اتعلمت حاجات عن نفسي، واكتشفت إن الوقت اللي قضيناه بعيد عن بعض كان مهم جداً بشأن أعرف أنا عايضة إيه من الحياة ومن العلاقات. أنا مش عايضة أكون قاسية عليك، بس لازم أكون صريحة. أنا دلوقتي مخطوبة، ومرتبطة بشخص بي فهمني وبيقدرني بالطريقة اللي محتاجها. الحياة خدتني في طريق مختلف، وبقيت سعيدة تاني. عارفة إنك كنت بتفكر فأني طريقة تصلح اللي حصل، وده شيء مقدره، لكن الحقيقة إني خلاص تخطيت يا سليم. مش معناه إني نسيتهك أو إني مكنتش مهتمة بيك، بالعكس، هتفضل جزء من ذكرياتي دائماً. لكن العلاقة بينا خلصت، أتمنى ليك كل خير.

صديقتك العزيزة (سابقاً)، رهف.

سليم قعد على الكرسي بتاعه، ماسك الجواب اللي رهف بعته، وقرأه مرتين، ثلاثة.

في الأول، حس بصدمة، مش مصدق إن العلاقة بينهم خلاص انتهت بالشكل ده.. الكلمات كانت ثقيلة على قلبه.

دماغه كانت بتلف بين الذكريات، بين اللحظات اللي قضاها معاها، وبين اللحظة دي اللي بيقراً فيها الجواب اللي قفل صفحات كثير من حياته.

بدأ يلاحظ إن عينه بتدمع من غير ما يحس، وبعد ما خلص قراءة الجواب للمرة الرابعة، بدأ يحس بوجع من نوع تاني... وجع القبول. أدرك إنه مهما حاول، رهف خلاص بقت جزء من ماضيه، وإنها مش راجعة تاني.

حس بنوع من الراحة بعد ما استوعب الحقيقة اللي هو عايش فيها. بص حواليه في الشقة، وفحين عدم وجود حد غيره.. الفراغ اللي حواليه بقي أعمق، بس في نفس الوقت، أدرك دلوقتي إنه بقي يقدر يملاه بحاجة جديدة. فكر في ليلي، وفكر إنه يمكن لازم يركز على اللي قدامه دلوقتي، بدل ما يفضل متعلق باللي راح.

قام من على الكرسي، وبدأ يمشي في الشقة، حس إنه محتاج يطلع من البيت.. انه يخرج في النور.

بص على الجواب اللي في إيده، وشاف إن مكانه مش درج، لأن الدرج هيفضل يفكره دايمًا بكل حاجة.. وقرر إنه يتخلص منه تمامًا.

قام من على الكرسي ودخل للمطبخ، جاب علبة الكبريت وولع عود. النار كانت بتتراقص ادامه، بتعكس شعوره المتناقض.

”بقيت حر.“

بهدوء حرق سليم الجواب، وشاف الورق بيتحول لرماد قدامه. كانت النار بتأكل كل كلمة، كل سطر، وكل ذكرى كان الجواب بيحملها.. حس

براحة غريبة وهو بيتفرج على الرماد وهو بيقع على الأرض والكلمات بتتحرق  
ادام عيونه.

بعد ما الرماد برد، مسحه بسرعة، لحد اخر اثر، أخيرًا، حس إنه فعلاً جاهز  
يبدأ من جديد.

بيمسح اثار الرماد، وبيقول لنفسه بهدوء، ”كفاية كده يا سليم.  
خلاص، انتهت.“

خرج من الشقة، وقفل الباب وراه بحزم.  
وهو في طريقه برا، الجو كان هادي ونسمة الربيع بتهدى حرقتة.

راح لكافيه قريب، قعد في ركن هادي بعيد عن الناس، طلب قهوة وهو بيبيص  
من الشباك اللي قدامه.

كان بيشوف الناس ماشية في الشارع.. كل واحد فيهم عنده حياته ومشاكله،  
المستعجل، واللي على كرسي متحرك، واللي بيدور على اكل عيشه، ويقول  
لنفسه، ”مشاكي مطلعتش كبيرة زي ما كنت متخيل..“

ليلى بترن عليه، بس عمل تلفونه صامت ومردش.  
بعد ما خلص القهوة، قرر يمشي شوية في الحديقة اللي جنب الكافيه، كان  
محتاج يتنفس هوا جديد.. ويمشي بين الأشجار.

وعلى مساء اليوم، رجع البيت وحس إنه أخيرًا جاهز يبدأ بعيد عن رهف وكل  
الذكريات اللي كانت مرتبطة بيها.

وفي اللحظات دي.. بابه يخبط، يتسم وهو بيفتح الباب على عجلة ويقولها  
بسرعة..

”قبل ما تقولي أي حاجة، نحجز القاعة آخر مارس؟“

# أصدقاء مارس

غارقاً في عالم مليء بالآمال  
الضائعة وأوهام الأسي، في محاولات  
التصالح مع الماضي، يجد سليم  
نفسه محاصراً بين ذكرياته في  
رحلة البحث عن الذات.



2024